

# Twie pond 'n stuver

Drok: Van der Meer, Oosterwolde

Foto's: Martin van Nieuwenhoven, Johan Witteveen, Jan Harm Spijkervet.

De Boekekraante is een uitgifte van de Stichting Stellingwarver Schrieversronte. Oplage: 21.000 stoks. Dit blad wodt huus-an-huus verspreid in Oost- en West-Stellingwarf.



De maekers van et boekewekegeschink „Greensgeval” en van et eerste Stellingwarver Geitebod: Henk Jan van Veen en Mattinus Bakker mit heur wederhelften Sija v. Veen-Mesken en Bettie Bakker-v. d. Heide. De foto is maekt op et boekefeest '84 deur J. H. Spijkervet.

Donkere wolken.....

## Veur de tiende keer sutelaktie in Stellingwarf

WOLVEGE. De Stellingwarver Schrieversronte maekt him weer op veur de jaorlikse sutelaktie. An de iene kaant reden veur feest, want et is de tiende keer dat de Schrieversronte dit spekaokel op poten zet. Naast de boekekraante is d'r een boekewekegeschink, een boekefeest en d'r verschiene tal van ni'je uitgiften. Dus aenlik allegere fleurig en feestelik ni'js, mar toch hangen d'r ok donkere wolken boven et Stellingwarver laand. De laeste weken is et bestuur van de Schrieversronte drok in et spier om wat de centraosie angaot de kop boven waeter te hollen. Diskeer komt de zwaore bewolking opzetten uut et westen. Bij de begrotingsbehaandeling 1986 van de gemiente West-Stellingwarf zal blieken of et gemientebestuur him dudelik inzetten blieden wil veur et behoold van et Stellingwarfs en de Stellingwarver

cultuur, zoas zo vaeke mooi in verkiezingspergramme's vermeld ston..... Et bestuur vint daj' de Schrieversronte as basisveurziening overaende hollen moeten. We zitten al jaoren op et minimum. Et is ja ok de ienigste instelling die flink wat uut 'e wege zetten kan en zet het veur et Stellingwarfs. Et is een koold keunsiens om alles wat in dattien jaor opbouwd is in ien klap an kaant te raegen. De Schrieversronte reket op et volk van Stellingwarf en op et gemientebestuur van West-Stellingwarf!

De sutelaktie brocht de laeste jaoren wel een goeie

Vervolg op pagina 5.

## Twie pond 'n stuver

Hadden wij verleden jaor een betien feest omreden de boekekraante „Twie pond 'n stuver” veur de vuufde keer verscheen, van et jaor doen we et niet veur minder, et feest wodt nog groter! Veur de tiende keer wodt de jaorlikse sutelaktie hollen, en netuurlik kan ieder van jim dat feit mit oons viieren op oons, ok al weer jaorliks weerommekerende, boekefeest op zaoterdag 28 september in Berkoop. De Stellingwarver Schrieversronte vaalt trouwes van et iene feest in et aandere, want ok et woordeboekwark bestaot in et naojaor tien jaor. Mar lao'we et now eerst es bij disse boekekraante hollen.

Hiel bieuzondere bladziede bin blz. 6 en 7. Die gaon louter over de Stellingwarver netuur. Ien pat is schreven deur de heer Wiebe Scheenstra uut Oosterwolde. Scheenstra is veural bekend deur zien wekelikse bi'jdregen over de netuur in Oost-Stellingwarf in de Ni'je Oost-Stellingwarver. Et ere pat is veur rekening van de heer Philip Zeinstra uut Wollege, bekend deur zien prachtige stokken in de „Stellingwarf”, over de netuur in West-Stellingwarf. Van dit stee of willen wij heur nog es hiel hatteliek daanken veur heur enthousiaste en

plezierige mitwarking! We hopen, dat we in de toekomst nog een hiele protte van jim lezen kunnen.

Mar netuurlik bin ok al die ere boordevolle bladzieden de muute van et lezen weerd. Bi'j-glieks blz. 9. Stiefvol infermaosie over die hiele belangrieke Federaosie van Streektaelorganisao-sies in et Nedersaksisch Taelgebied kotweg SONT nuumd.


Veerder is d'r netuurlik een protte ommedaanken veur al oonze ni'je en oolde uitgiften. Woj' graeg zoe'n ni'je uitgifte kopen, mar ie bin krek op die iene suteldag dat ze bi'j jow an de deure kommen niet thuus, dan kuj' vanzels altied de bestelbon van blz. 13 invullen en opsturen.

Tot slot, liek as alle ere jaoren, oonze bieuzonder grote daank an al oonze adverteeders, zonder heur zol „Twie pond 'n stuver” beslist niet verschiene kunnen. Oonze redaktie beston uut leden van de publiciteitskommissie van de Stichting Stellingwarver Schrieversronte: Harmen Houtman, Pieter Jonker, Henk Kroese en Sietske Bloemhoff. Tot toekem jaor!

Now zaoterdag in Berkoop

## Boekefeest en Stellingwarver dag

BERKOOP. Zaoterdag 28 september wodt veur de zesde keer de Stellingwarver Dag hollen. Et pergramme wodde veurbereid deur een warkgroep bestaonde uut Zwaantje Kuiters-Keizer, Lamkje Hof-de Boer, Jelke Nijboer, Roelof Dragt (allegere uut Berkoop), Ybe Duursma (Der Izzerd) en Pieter Jonker (De Haule). Aovens wodt et Boekefeest van de Schrieversronte hollen. Et pergramme wodt



THE GRIFFIN JAZZGANG

veur et grootste pat hollen in de zael van et kefé „Et Waopen van Oost-Stellingwarf” in Berkoop. Twie onderdielen bin op een eer plak.

Et pergramme gaot om half twieje uut aende mit et kienderpergramme. Disse keer staot et ni'je kienderboek van Zwaantje Kuiters-Keizer centraol. Bea Knol, Martha Dragt, Jans de Vries, Maria Vogelsang en aanderen bin al drok doende mit de veurbereidings. Et wodt ofwisseld mit poppekaast, zang en meziek. An et aende van et pergramme wodden de eerste exemplaoren van „Ze weren d'r echt” anbeuden an Zwaantje Kuiters-Keizer en Sietske Bloemhoff. De kiender wo'n trakteerd op een glassien ranje. Om half drieje is d'r in de Hervormde Karke een concert van et korps „De Wooldklaank” uut Noordwoolde o.l.v. K. Nijdam. De Warkgroep Stellingwarver Dag is slim bliede mit dit optreden en reket op een volle karke. Half viere is de tied van et dichtersure. Gaasten dit jaor bin Jannie Boerema, Lamkje Hof-de Boer en Margje Jonker-Veenstra. Veur mezikaole begeleiding zorgt de gitarist Doeke Dokter uut Ooldeschoot. Et

Vervolg op pagina 5.

NI'J - NI'J - NI'J - NI'J  
MEDIALAND  
OOSTERWOLDE

Brinkstraote 1, till. 05160-4962  
(v/h De Toverlantaarn)

De speciaalzaeke in videofilms,  
grammefoonplaeten, singles,  
compact disc en verhuur video-  
recorders

De grootste videotheek in de  
Z.O.-hoeke van Friesland

Volop parkeergelegenheid

Geunstige eupeningstieden:  
daegelijks 10.00-21.00 ure  
(van 12.30-13.30 ure dichte)  
zundags 14.00-19.00 ure

De koffie staot klaar

Eupening: vri'jdag 27 september



van 1 tot 13 oktober 1985

BERKOOP. Mit et grote boekefeest op zaoterdag-aovend 28 september gaot de Stellingwarver Boekeeweke uut aende. Bi'j ankoep van f 20,- an Stellingwarfstaelige boeken kriej' et prachtige boekien „Greensgeval” van Jouk en Henk Jan van Veen kedo. Winkelweerde is f 6,50.

De volgende boekwinkels doen mit de aktie mit. Ze kun alle beschikbare Schrieversronte-titels leveren: **BOEKWINKEL DE JONG**, Appelsche;

**KROMKAMP**, Berkoop; **BOEKWINKEL DEDDENS**, Haulerwiek; **BOEKWINKEL BAHNMÜLLER**, Oosterwolde; **BOEKWINKEL PLAATSMAN**, Wollege; **TERPSTRA**, Scharpenzeel; **BOEKWINKEL TACONIS**, Wollege; **BOEKWINKEL ZWIKSTRA**, Wollege; **STEG**, Donkerbroek; **BOEKWINKEL FARNHOLT**, Noordwoolde; **BOEKWINKEL MOLENBUUR**, Wollege.

# Et kienderhoekien *verzorgd deur Harmen Houtman*

## Groot feest

D'r is een groot feest. Op een stok laand staot een hoge tente. Daor gaon een protte kiender en meensken henne. Ik zie zels een peer dieren. Es even kiekien of ik d'r iene van kenne.

O ja, verhip, daor lopt Kereltien Kwast. Kennen jim him ok? Da 's Kereltien Kwast uut „Et kienderboek van Jouk”. Hi'j dee zokke vrede dingen in de klasse op schoele. Ie kun haost niet zien, dat hi'j et is. Op zien heufd het hi'j een lange puntmusse. An zien kin is een lange witte baord plakt. Hi'j dreegt een rood pak. Krek, hi'j liekt een protte op een ke-bool-ter. Kereltien Kwast gaot as ke-bool-ter naor et feest.

Wie lopen daor? Die kenne ik ok. Dat bin Haarm en Maaike. Ze speulen in et tenielstok van Harmen Houtman. Ze hadden omnes zoe'n oold vasien in de tuun vunnen. Dat wollen ze zo graeg verkopen. Doe kwammen d'r goe-nend om et te stelen! Haarm het een lang naacht-hemd an en een pispot in de haand. Maaike liekt op een non. Ze dreegt een witte kappe op et heufd en een lange zwatte jurk. Aarm in aarm stappen ze de tente in.

Daor komt iene, die aj' haost niet zien kunnen. Et is Piepmoes. Piepmoes uut dat mooie lietien van Henk Bloemhoff. Weten jim et nog: Piepmoes, piepmoes, ie bin mien kammeraad, Piepmoes, piepmoes, ie bin mien beste maot. Hi'j vint et mooi om naor et feest te gaon. Hi'j wet dat Klaos de Kaeter d'r niet komt. Om zien statten het ie een klein rood strikkien. Zo zien de anderen him beter, eers kun ze wel op him trappen!

Et wodt de hielied drokker. In de veerte zie ik een oold wu-fien. Ze lopt niet vlogge. Et is oolde Jaantien uut et gedicht van Johan Veenstra. Ze had omnes zoe'n last van rim-me-tiek. Et zalfien wat as ze kocht was waegensmeer en het niet hulpen. Stao-rig komt ze dichterbi'j. Ze zicht d'r uut as een toverfee. Een hoge puntmusse mit een wit gedien d'r an en een lange gele jurk, die as over de grond sleept.

Bi'j de ingang van de tente staot de bakkiesman. Veur zien boek hangt zien bakkien. Gewoonlik het ie daor knopen, gaoren en stokkies baand in. Now niet. Hi'j verkoopt feestneuzen, feesthoeden en pruken in alderhaande kleuren. Zo now en dan raekt ie wat kwiet. De meersten hebben heur thus al op-tae-keld. Soms hebben ze uren veur de spiegel zeten of staon. Ze hebben et gezichte kleurd.

D'r kommen ok kiender. Daor bin Jan en Jet. Ze stonnen ok in et lieties-boekien mit de Piepmoes veurop. Ze weren een dag bi'j Jan Boer. Jan op zien ni'je klompies en Jet mit heur rooie autopod. Kennen jim et vassien nog? Ze hebben ok aandere kleren an. Ze kommen as boer en boerinne. Jan het een vörke in de haand en Jet een rooie busdoek op et heufd.

Wie hewwe daor now? Die ken ik ok. Dat is et hat van De Langelille. Hi'j is zo uut „Et kienderboek van Jouk” lopen. Uut dat hiele lange gedicht. Dat hat hadde al die kronkels in de stat. Ze zitten d'r nog allemaole in. Veur dit feest het ie nog wat eers daon. Tussen zien gewei zit een draotien. Daor het ie wasgoed an hangen. As ie vlogge lopt wi'jt et in de wiend.

De tente wodt de hielied voller. Om 9 ure kan d'r niet iene meer in. An de ziedkaante staon taofels en stoelen. Daor zitten ze allegeer op. In de midden is een daansvloer. D'r is ok meziek.

Drie ke-bool-ter maeken meziek. Et bin Ulf, Alf en Olf. Nooit van heurd, zeggen jim. Dat klopt. Ze kommen uut et boek van Zwaantje Kuiters. Et boek is wel schreven, mar moet nog maekt wodden. Dat duurt niet lange meer. Dan kun jim heur aventuren lezen. Ze bin wel op et feest. Ulf speelt op 'e moenike, da's een akkordeon, Alf slat mit zien stokken op 'e tromme. Olf zingt vassies. Wat kan ie mooi zingen. As ie et liet van „Piepmoes” zingt, lat ie Piepmoes zels op zien haand zitten. Et statten mit et strikkien gaot op en daele mit de meziek. Hi'j zingt netuurlik ook over

de bakkiesman. De bakkiesman daanst dan allind mit zien bakkien over de daansvloer. Hi'j dot krek as zien bakkien zien vrouw is. Olf zingt nog over Baoke Zwelver, et Stiekelvarkentien, iene, twee, drieje, vier, hoj en Jan mit de pette. Wat kent die keboolter een protte lieties!

Iederiene op et feest gaot de daansvloer op. Haarm daanst mit Maaike, Jan daanst mit Jet. Oolde Jaantien mit Kereltien Kwast en et hat van de Langelille mit Piepmoes op zien rogge. Op et aende van de aovend bin ze of-gries-lik muui. Ze kun gien stap of pote meer verzetten. Ze kriegen ok dust. Van tied tot tied komt de ober veurbi'j mit grune Kuunderprik of paorse Lende-ranja. Haarm drinkt een glassien Stel-ling-war-ver krudenbitter. De meziek-keboolters kun haost niet meer speulen.

Om 12 ure hooft et grote feest op. Dan gaot iederiene naor huus toe. Ze trekken heur vrede kleren uut. Dan zien ze d'r weer gewoon uut. En dan op bedde? Nee heur! Ze slaopen in et boek waar as ze uut kommen. Dat is heur huus. Heur huus is misschien ok wel bi'j jim thuus. In jim boeke-kaaste staon de boeken misschien ok wel waar ze wonen. Kiek mar es. Ze staon d'r now weer allegeer in, want et feest is veurbi'j.

H. H.

## Ni'j kienderboek

D'r komt een ni'j kienderboek. Et is een boek schreven deur Zwaantje Kuiters-Keizer. Vienen jim dat eins gien mooie veurnaeme, Zwaantje? Ze woont in Berkoop. Dit is et eerste boek dat deur heur zels schreven is. Dat boek is in et Stelling-warfs schreven. Et hiet „Ze weren d'r echt”.

Et is een verhael over drie keboolters. Ze hieten Alf, Ulf en Olf. Dat lieken me echte keboolter-naemen. Ze bin uutkeuzen om de wereld van de grote meensken te onderzeken. Die mannegies mit heur lange witte baorden en puntmussen bin hier al hiel laank niet west. Ze willen weten hoe as alles veraanderd is. Et wodt een tocht mit een protte aventuren en een protte geveer. Een oolde knien raad et heur of. „Meensken bin vrede schepsels,” zegt ie, „ze schieten op knienen, haezen, fezaanten en aandere dieren. Ze zullen jim ok vaast wat andoen.” Mar de keboolters trekken heur d'r niks van an, ze gaon deur. Bi'j een stokmennig koenen

## De optel en oftrek kwis

Zo as ere jaoren ok now weer een kwis op de kiender-bladziede. De vraogen gaon over „Et kienderboek van Jouk”. Een protte van jim hebben dat wel daenk'. Thuus of op schoele. Et antwoord op iedere vraoge is een ciefer. Wat moej' now doen mit die ciefers? Et antwoord van vraog iene tel ie op bi'j vraog tweeje. Et antwoord van vraog drieje trek ie daor weer of. Dat van vraog viere tel ie d'r bi'j op. Van vraog vufe d'r weer of. Nao elke vuuf vraogen et antwoord opschrievien.

Dus antwoord 1+2—3+4—5. D'r bin vraogen veur de kleinen en veur de groten. Dus ok twee keer priezen.

### A. (kiender van 0 tot 8)

1. Hoevule stiekelvarkentien staon d'r veur op et boek?
2. Hoevule kikkers staon veur op 't boek?
3. Hoevule voegels staon d'r achter op et boek?
4. Hoevule vliegen bin d'r achter op et boek?
5. Hoevule bloemen het de man veur op 't boek in zien mond?

(now hewwe 't eerste antwoord)

### B. (kiender van 9 tot 12)

1. Hoevule kiepen had Berend Battels in et eerste verhael van et boek?



perberen ze ok nog wat an de weet te kommen over die meensken. Et dot blieken, dat de meensken heur te eten geven en zi'j geven daor melk veur weeromme. De kalver laoten ze nooit bi'j heur. Ze kommen nog een dier tegen, een hond. Hi'j gaot nog meer mit meensken omme. Meensken zeggen dat keboolters niet bestaon, vertelt hi'j. Now zicht ie zels, dat et niet waor is. Dan zien ze de eerste kiender, Rennie en Pieter. Ze bin slimme schrutten, mar durven et toch even om an de baord van de keboolters te vulen. Die bin echt, de kiender vertellen et wieder.

Dan kommen ze bi'j de echte grote meensken. De drieje dwaelen deur een wereld, waor alles allemachtig groot is. Ze bruken daor dingen, waor

zi'j nog nooit van heurd hebben. Ze kennen gien radio, gien tillevisie en gien ieskaaste in keboolterlaand. Ze vienen et vrede, dat d'r waeter uut de kraene komt!

Alles schrievien ze op in een soortement geheimschrift. Hielied meer wo'n ze zien deur de meensken, die niet geloven in die kleine mannegies. De burgemeester gefd dan ok de pliesie opdracht om ze te pakken. Zo raeken ze de hielied wieder verzeild in oonze wereld. Ze heuren hoe as et mit de zegeuners gong in de oorlog. Ze kommen in de kunde mit Ineke, Ko en Anna, Teddie de hond en Eke de eekhoorn. Wie dat allegeer binnen vertel ik niet. Dat moe'n jim zels mar lezen in dit mooie boek.



2. In welke klasse zee Kereltien Kwast dat hi'j een gulden kwiet was?
  3. Op welke bladz. in et eerste verhael staot een keboolter mit een pleister op 'e wange?
  4. Hoevule knopen zitten d'r in de vlieger die bi'j et haentien van de toren hangt?
  5. Hoevule oelen staon d'r op et plaetien op bladz. 110?
- (now weer et antwoord)

### D. (veur kiender van 9-12)

1. Op welke bladz. begint et verhael „Baos boven baos”?
2. Op welke bladz. begint „Dörp in de winter”?
3. Wat veur ciefer staot d'r in de aachternaeme van „Jannes die uut visken gong”?
4. Wat is et middelste ciefer van et tillefoonnummer van Kereltien Kwast?
5. Wat is et laeste ciefer, dat as onder an een bladz. staot in dit boek?

(now weer et antwoord)

De kleinen hebben now twee antwoorden en de groten ok. Disse twee antwoorden op een kaorte zetten en sturen veur 15 oktober 1985 naor Stichting Stellingwarver Schrieversronte, Postbusse 138, 8430 AC in Oosterwoolde. Boven an de kaorte graeg Kwis.

2. Hoevule kikkers staon d'r bi'j et gedicht „de kikker”?
3. Hoevule kronkels had et hat van Langelille in zien stat in 't eerste couplet?
4. Op welke bladziede zitten d'r vuuf keboolters om een taofel mit in 't midden een kiepe?
5. Op welke bladziede staot Herta, een hiele lelke hond?

(now hewwe 't antwoord)

### C. (veur kiender van 0-8)

1. In welke klasse zat Kereltien Kwast veur et eerst bi'j meester?

# WAT IS D'R NOW STELLINGWARFSE DAN 'N STELLINGWARVER BAANK?

De Coöperatieve Veurschotbaank. Een typisch Stellingwarver baank.  
Mit vestigings in Berkoop en Noordwolde. Een kleine baank dus, mar wel  
mit grote prestaosies. Kiek mar es naor oonze rentetarieven.

Of naor oonze hypotheken.

Die kun mit glaans elke vergelieking deurstaon.

Mar niet alliend op financieel gebied het de Veurschotbaank grote veurdielen.

Ok op et persoonlike vlak staon wi'j ons mannegien/vrouwgien. Bi'j oons  
hebben klaanten een naeme en kriegen alle aandacht die ze verdienen.

Mar zeg now zels, zo heurt et toch ok in de Stellingwarven?

De Veurschotbaank. Een kleine baank, mit een compleet dienstenpakket.

Van Zulvervloot tot Hypotheek, van Verzekering  
tot Rekening Courant.

En bovendien: DE BAANK DIE JOW TAEI PRAOT...

## DE VEURSCHOTBAANK, DE STELLINGWARFSTE BAANK VAN DE STELLINGWARVEN



VOORSCHOTBANK OLDEBERKOOP/NOORDWOLDE

Coöperatieve Voorschotbank B.A.

W. Prinsstraat 10  
Postbus 1  
8420 AA Oldeberkoop  
Tel. 05164 - 441

Hoofdstraat Oost 6  
Postbus 101  
8390 AC Noordwolde  
Tel. 05613 - 2825

**EEN NI'JE KLEUR**  
in tegels  
en sanitair...



**Jura gries**

Een prachtige neutrale kleur...  
ideaal mit een protte soorten  
accessoires te kombinieren  
Te kriegen in effen of  
gedessineerd

et  
bekieken  
weerd...



**Baderie**

ALLES VEUR DE BADKAEMER

**Bakker bv**

't Oost 8  
8431 LJ Oosterwoolde  
till. 05160-3841

**dannika  
kadoshop**

Deense kleding en  
keunstni'jverhied

Een boel keur in:  
glas, hooft, keramiek,  
sieraoden van tin en  
broons, mobiles,  
keersen, stofdrok en gao  
zo mar deur

TINEKE KNOL  
Brinkstraote 3, Oosterwoolde

KOM IND OG KIG  
(Kom mar es binnen)



Daegeliks vasse bolle,  
koeke en gebak  
van jow

**waarme bakker**

**D. van der Wal**

't Oost 12, Oosterwoolde, till. 05160-2561

**Veur al jow boeken en  
kantoorartikels naor de  
spciaalzaeke**

Alle boeken van de  
Stellingwarver  
Schrieversronte  
uut veurraad leverber  
Mit de post versturen  
ok meugelik

**C. BAHNMÜLLER**  
LJW BOEKHANDEL/DE KANTOORSPECIALIST  
STATIONSBSTRAAT 19  
8431 ET OOSTERWOLDE  
TEL. 05160.2145



SCHILDERSBEDRIJF

**De Vos b.v.**

Hornleger 9  
Oosterwoolde  
Till. 05160-2164

Veur  
vakkundige  
bediening  
naor

salon wijma  
**HAARVERZORGING**

Oosterwoolde, Rijweg 19, till. 2103



speerbaank

**Salarisrekening,  
speren, verzekeren,  
lienen, hypotheken,  
butenlaans geld,  
reizen**

Doe meer mit de speerbaank die meer dot

friese  
bondsspeerbaank



Oosterwoolde, Stationsstraote 8, till. 05160-5508  
Haulerwiek, Heufdweg 3, till. 05161-1222

**Alfa Romeo**

**HONDA**

Dealer veur de gemienten  
Oost- en West-Stellingwarf

**AUTOBEDRIEF  
„CENTRUM”**

D. HOOGENBERG  
Vaort z.z. 82, Appelsche

Ok et goeie adres veur occasions  
met Bovag-geraansie

**CITROËN**

**HYUNDAI**

**nieuwkoff**

**Autobedrijf**

't Oost 46, Oosterwoolde,  
till. 05160-5980

**RESTAURANT**  
**Hof van Oldeberkoop**

8421 PA Berkoop till. 05164-427  
Oosterwooldseweg 3

Hof van Berkoop  
Trefpunt veur meensken  
die van lekker, betaelber  
eten holer  
Elke dag eupen  
Ok Schrieversronte-leden  
kun d'r over mitpraoten

Al een  
hieboel  
jaoren  
specialist -



Madras  
on the move

in grote  
maoten  
heren-  
mode

Maoten  
46 t/m 62  
Boekmaoten:  
48 1/4 t/m  
62 1/2  
Lengte-  
maoten:  
47 t/m 55  
Alliend  
markartikelen  
tegen de  
leegste pries

**KOOISTRA'S  
KLEDINGHUIS**  
Wolvega

Hoofdstraat 21 Tel. 05610-4888

Heufdstraote 21, till. 05610-4888

**Veur de tiende keer  
sutelaktie in Stellingwarf**

Vervolg van pagina 1.

tienduizend gulden op, vertelt oons sutelaktie-anvoerder Geert van der Meulen uut Oosterwoolde. „As et weer mar mit zit dan doen we weer een flinke raom naor die tienduizend gulden,” zegt hi' enthousiast, „mar veurig jaor biwwe d'r iene dag hielendal uutregend en dan moej' een zaoterdag extra bi' et pad.” Neffens Renny Betten hewwe over klandizie nooit te klaegen: „D'r is al es naogaon dat de Stellingwarver bevolking tot an now toe al veur een goeie 350.000 gulden an Stellingwarfstaelige boeken kocht het. Dat mos ok wel, want anders hadden die krapan veertig vershillende titels ok nooit vershienen kund.”

As kedo bi' ankope van twintig gulden kriej' van et jaor een kostelik boekien ommenocht. Et gaot om „Greensgeval” van Jouk mit tekenings van Henk Jan van Veen. In de winkel kost et f 6,50.

**NI'J**

Over de ni'je uitgiften laoten we Henk Kroese an et woord: „De Schrieversronte komt ok weer mit hiel wat ni'js: et Stellingwarver Geitebod. Et gezelschopspul bestaot uut een bod mit een prente in kleur van Henk Jan van Veen. Op et bod lopt een speulse route van 63 hokkies deur Oosten West-Stellingwarf. Op tal van nommers vaalt wat te beleven en dat kuj' vienen in et rieglement dat deur Jouk bedocht en op riem zet is. Et spul wodt speuld mit ien of twee dobbelstienen en zes hoolten geiten (die wo'n d'r bi' leverd). De reize van de geite deur de Stellingwarver omkrietien zit vol aeventuur en d'r vaalt netuurlik mit et duo Jouk/Henk Jan van Veen weer een protte te lachen.”

Et spul wodt prissenteed op et boekefest op 28 september in Berkoop en wodt anbeuden an alle oold-veurzitters van de Geitefok. De pries is lege: f 8,50 en d'r bin 750 van maekt. Henk en Anja de Zeeuw uut Else hebben d'r veur zorgd dat alles d'r knap uutzicht. D'r mossen 4500 geiten van een kleurtien veurzien wodden, dat ze hebben heur daor in Else van de zommer niet verveeld,” zegt Henk Kroese lachend.

**PLAETE**

Fris, fleurig en ni'j is ok de ni'je plaete die maekt is deur „Kort Geding”. Vier nommers staon d'r op disse singel. „Kort Geding” is de meidepopgroep uut Wolvege, die mit eigen teksten en meziek op 'e Stellingwarver mark vershient. Sietske Bloemhoff hadde de produktie in hanen en dat was heur prima toevertrouwd. „Zonder heur hulpe hadden we et hielendal niet opred!” zegt Renny Betten van de warkgroep Publiciteit. Johan Veenstra zorgde d'r veur dat de teksten ok taelkundig verantwoord weren. Eddie de Jonge wodde as bassist antrokken en dat maekte de hiele plaete compleet. De singel is pasd in een oplaoje van 1000 stoks en kost f 6,75.

**KIENDERBOEKEN**

Geweldig goed ni'js ok op et front van de kienderboeken. Et boek „Ze weren d'r echt” van Zwaantje Kuiters-Keizer uut Berkoop mit prenten van Sietske A. Bloemhoff vershient op 28 september. Deur toedoen van de perveensie Friesland, de Rabo-baanken in Friesland en de Stellingwarver Schrieversronte kriegen alle kiender van groep 5 en 6 van de basisschoelen in Oosten West-Stellingwarf dit boek ommenocht. Veerder is et boek gewoon in de boekwinkel en kost et f 12,50. Vlak veur de Sunderklaos vershient veur de jongere kiender „Dikke Doezerd” van Dolf Verroen. Vertaeling en bewarking Pieter Jonker, mit tekenings van The Tjong King. Pries: f 12,50.

Zwaantje Kuiters-Keizer in gesprek mit Schrieversronte-veurzitter Henk Bloemhoff.



Sietske Bloemhoff

En dan wodt d'r nog drok warkt an een mappien mit vier ni'jaarskaorten mit prenten van Dirk Kerst Koopmans, Henk Jan van Veen, Fred Zoer en Sietske A. Bloemhoff.

Al mit al keur genog. Mit de sutelaktie rekenen we weer op jim! D'r bin sutelders bi' die van et jaor veur de negende of tiende keer mitgaon. Op dit plak: Hulde veur disse mitwarkers van et eerste ure. De sutelaktie kan niet zonder de hulpe van disse trouwe vrijwilligers en vrijwilligsters. Aj' de gezellige sfeer van de sutelaktie ok es pruvien willen, geef je es op om een dag mit te doen. Anmelding bi' Renny Betten-Popkema, Laak 15, Oosterwoolde (05160-1234) of bi' de Stellingwarver Schrieversronte, Pb. 138, 8430 AC Oosterwoolde, tillefoon 05160-4533.

**Sutelaktie  
nommer tiene komt**

Op zaoterdag 5 oktober in Ni'jberkoop, Oosterwoolde (zuudkaante vaort/westkaante Snellingerdiek), Makkinge, Else, Tronde; op woensdag 9 oktober in Berkoop, Buil, De Oosterstreek, Der Izzerd, Ni'jhooltwoodde, Hooltwoodde; en op zaoterdag 12 oktober in Steggerde, De Blesse, Blesdieke, Sunnege, Wolvege, Ni'j-laemer, Ooldelaemer.

Sutelders kun heur anmelden bi' Renny Betten op 'e Laak 15, Oosterwoolde (05160-3898) of bi' de Stellingwarver Schrieversronte, Postbusse 138, Oosterwoolde (05160-4533). Dat moej' es mitmaeken!

**Niks**

Mien pake veegt et pattien,  
mien beppe klopt een mattien,  
mien tante breidet een sokkien,  
mien omke drinkt een slokkien,  
mien nichien ligt in 't bettien,  
mien neefien dreegt een pettien,  
mien zussien et een droppien,  
mien breurtien brekt een koppien,  
mien moeke ni'jt een busien,  
mien vader zit op 't husien  
en ik  
ik doe lekker niks....

H. H.

**BON**

Ja, ik geve mi'j op veur de cursus Stellingwarfs I, 1986

Naeme: .....

Adres: .....

Postcode plus plak: .....

Tillefoon: .....

Mi'j komt de .....aovend/zaoterdagmiddag et beste uut

**Wie dot mit an de  
cursus Stellingwarfs I?**

**BERKOOP.** Et wodt alweer de tiende keer dat d'r een cursus Stellingwarfs I organiseerd wodt in de schoele van Berkoop. Krek as veurgaonde jaoren zal die in jannewaori beginnen. De cursus bestaot uut tien lessen van twee uren, mit an et aende nog een slotles, daor aj' nog es persoonlik overheurd

**Boekefest  
en Stellingwarver Dag**

Vervolg van pagina 1.

dichtsure wodt prissenteed deur Zwaantje Kuiters-Keizer.

Om half vieve hoolt Philip Zeinstra uut Wolvege een lezing over de netuur in West-Stellingwarf. Hi' zal een prachtige riegel toverlanteernplaeties zien laoten. Zeinstra schreef al krapan tweehonderd ofleverings veur zien rebriek „Onze Natuur” in de „Stellingwarf”. Ok in disse boekekraante vienen jim een artikel van zien haand.

Aovens om acht ure begint et aovendpergramme van de Stellingwarver Dag en dat is toegelieke ok et Boekefest van de Schrieversronte. De meziek op disse aovend wodt verzorgd deur „The Griffin Jazzgang” uut Oosterwoolde. Dit orkest speult oolde stiel jazzmeziek. Ze brengen luuster- en daansmeziek. Et is et huus-orkest van de Jazzclub Oost-Stellingwarf. De bezetting bestaot uut Gert Veldman (trompet), Bert Nomen (trombone), Jaap v. d. Veen (klarinet, altsax), Ton Töben (bas), Wim de Vries (drums, wasbod) en Klaas Sporrel (banjo, zang). Ze brochten een poze leden heur eerste langspeulplaete uut.


Et aovendpergramme bestaot uut twee grote „klappers”. In et veurste plak de prissentaoisje van et Stellingwarver Geitebod van Jouk en Henk Jan van Veen. Karst A. Berkenbosch prissenteed et en hi' zal d'r wel veur zorgen dat de meensken heur de busen uitscheuren. Et eerste Stellingwarver Geitebod wodt anbeuden an alle oold-veurzitters van de Geitefok van Berkoop. Ze moe'n van heinde en verre kommen, mar ze bin allegere persent.

De grote „uutsmieter” van de Stellingwarver Dag wodt et pergramme dat Tetman de Vries en zien vrouw Mine brengen mit as mitwarkers twee hiel bekende Berkopers: Lamkje Hof-de Boer en Appie Tjalma. Et wodt een pergramme van goed een ure en et is de bedoeling dat et een Fries/Stellingwarfs gehiel wodt. De Schrieversronte rekt d'r op dat de zael van „Et Waopen van Oost-Stellingwarf” te klein is, mar as de kaorten op binnen dan gaon de deuren dichte. Et orkest „The Griffin Jazzgang” zorgt d'r veur dat d'r ok nog gezellig wat daanst wodden kan.

wodden en as dat d'r wat op liekt, kriej' ok nog een diplome. In de lessen wodt andacht besteed an et lezen en schrieven in et Stellingwarfs, an tael en literatuur an creatief schrieven en an de geschiedenis van Stellingwarf. In die lessen lat cursusleider Geert Lantinga o.e. slim mooie toverlanteernplaeties zien. Ok wodt d'r onder leiding van Lantinga ieder jaor een schitterende excursie argens in de prachtige netuur van Stellingwarf maekt. De cursusleiding bestaot veerder uut Sietske A. Bloemhoff en Zwaantje Kuiters-Keizer.

Et cursusgeld is f 30,-, en dat is niet vule, want daor kriej' een cursusboek veur en elke les een heerlik bakkien koffie mit een stok koeke d'r bi'. Et liekt d'r op dat d'r van 't jaor nog al wat belangstelling veur is, dat geef je mar gauw op, de koppel moet ok niet al te groot wodden.

Op 'e onderstaonde bon kujje opgeven en ie kun ok nog vermelden, wanneer as et je et beste schikt, dan zal daor zo vule as meuglik is rekening mit holen wodden. De bon kuj' in een eupen kevort naor et buro van de Stichting Stellingwarver Schrieversronte, Antwoordnetnummer 42, 8400 XC Oosterwoolde, sturen. Ie kun netuurlik ok even bellen: 05160-4533. Lao'we zeggen, tot jannewaori!



Jouk, de schriever van et boekewekegeshink „Greensgeval”

**Hiel gewoon**

Jannie is bakker,  
Henk stof een stoel,  
Pietsje is slaachter,  
wat een vremde boel.

Jan veegt de vloer,  
Stien zit op 'e trekker,  
Bert kookt de eerpels,  
't wodt hoe langer hoe gekker.

Ria bestuurt de trein,  
Piet zit an de tillefoon,  
Gerda legt de tegels,  
da's toch niet gewoon!

Dirk geft een doek  
en Trientsje dot dat ok  
en mit heur kleine poppien  
hebben ze zoe'n gelok!

Ieder dot wat ie wil  
en dat moej' nooit vergeten,  
laot ze mar lachen,  
zels zullen we't toch 't beste weten.

Harmen Houtman



**PUZZEL**

Een rebus disse keer. Niet zo hiel muulik wel? De oplossing kun jim veur ien november sturen naor: De Stellingwarver Schrieversronte, Postbusse 138, 8431 AC Oosterwoolde. Veur de prieswinner ligt d'r weer een prachtige pries klaor!

# Oonze netuur in West-Stellingwarf

In et onvolprezen West-Stellingwarf komt een riegel grondsoorten veur, die mit mekeer veur een variaabel laandschop zorgen. Dat laeste vint zien weerslag in de riekdom an plaanten en dieren. Laandelik bekend in dit verbaand is de Lendevallei. Mar echt niet minder is een gebied dat een protte overienkomst daor mit vertoont en dat is de Rottige Mienthe. Op gronden die hoger liggen is d'r spraake van een hiel eer soort netuurleven. Op 'e Blesdieker Heide mar ok op 'e hooftwallen en op tal van ere plakken vienen we restaanten weeromme van et ieken-birkenbos om mar wat te numen. Verspreid over de gemiente liggen nogal wat velties waor as heide op veurkomt. Laandelik bin die zels van belang.

## VLINDERS

Ieder keer aj' te kuieren gaon ten tiede van et gruui en bluuiseizoen kommen we oonze gevleugelde vrunden wel tegen. Wie kent bi'jgliks niet et citroentje? Al in feberwaori kun we de eerste op een zunnige dag begroeten. De mannegies bin opvalend geel van kleur, de wiefies bin vule blieker. De roepies van disse veurjaorsboden kommen veur op bepaalde soorten van de wegedoornfamilie, bi'jgliks op 'e honnebeie of honnemiegehoort, een struke die as een protte veurkomt. De vlinders die as hier uut kommen holen krek lieke goed een zomer- as een winterslaop. Daorum zien we disse generaosie in de zomer mar evenpies en veur de rest weer in de eerste maonden van et volgende jaor.

Van de familie van de zaandogies komt d'r in West-Stellingwarf een hiele riegel veur. Prachtige beesten bin et heur! De kleur is bruun, oranje of ze bin nogal bont, wiels op 'e vleugels tal van opvalende „ogies” zitten. In 1983 trof ik bi'j Zaandhuzen 6 soorten an. Mit naeme de argusvlinder. Dit is een opvalende verschieping mit een protte oranje mit daorbi'j een grillig donker strepenpetroon. Ok et bonte zaandogien was d'r, krek zo groot mar dan mit bruun en mit lochtige vlekkes. Van de Rottige Mienthe is de zulveren maone et numen weerd, wiels et laandkaortien op 'e hieltied meer plakken bekend wodden is.

Veurig jaor en ok dit seizoen heb ik es keken naor et veurkommen en et tal van soorten van naachtvlinders in West-Stellingwarf. Aenlik staon disse dieren bekend as motten en dergelike, mar



Distelvlinder.

dat dot jammer genoeg niet vermoeden hoe prachtig van kleur en vorm disse naachtbrakers wezen kunnen. Et totaal an soorten komt ondertussen veer over de 350. Gelukkig is d'r ok in vroegere jaoren onderzook naor daon. De heren M. Camping en G. Dijkstra hebben vanof de veertiger jaoren riegelmaatig inventarisasies uitvoerd. Tegere mit de gegevens van disse twee deskundigen kan ik uiteindelik vaaste stellen, dat d'r meer dan 500 vlinders (ok de dagvlinders mitteld) in oonze gemiente veurkommen. Dat is mar even 25 percent van de Nederlandse vlinderfauna. Uteraord heuren daor ok de niet echte Nederlandse soorten bi'j zoas de atalanta en de distelvlinder. Die bin van zudeliker streken ofkomstig en trekken van daoruut in wisselende aantallen noordeliker. Hoevule dat d'r binnen hangt van de weersomstandigheden of. Tot overwinteren bin ze niet of hoogst zelden in staot. Mar toch bin ze d'r ieder jaor praktisch weer deur vasse anvoer. In de volgende jaoren zal et vlinderonderzook ok deurgaon en te verwaachten vaalt dat et tal van soorten nog groter wodden zal.

## PODDESTOELN

West-Stellingwarf blinkt uut mit een peer niet te overtreffen laenen, waarvan de baarms in et naojaor een rieke flora van poddestoelen vertoont. Schitterend is bi'jgliks de beukelaene an de zudkaante van De Hoeve. In oktober verleden jaor heb ik daor een eerste inventarisasie uitvoerd. Mar liefst een twaelftal soorten van et geslacht Russula ston d'r. Dat bin zwammen mit



Klokjesgentiaan mit eigies van et Gentiaanblauwgien.

een briede hoed, een kotte dikke staele en ze bin vaeks opvalend van kleur. Russula's heuren tot de groep poddestoelen die onder de grond in verbiening staot mit grune gewassen. Op et plak van kontakt wo'n de neudige voedingsstoffen uutwisseld. D'r bin d'r hiel kieskeurig binnen, eren komt et niet zo krek.

Opvalend veur wat et eerste an gaot was de massale aanwezigheid van de valse Braakrussula. In disse laene staon ommes beuken en juist daormit het disse zwam een overienkomst ofsleuten. In 1984 stonnen d'r mar even 100 exemplaoren van. Ze bleven d'r tot december. Ze kun dus wel tegen wat koolde! De valse Braakrussula vaalt al vanuut de veerte op deur de scharlakenrooie kleur van de hoed en veerder deur de blaanke staelen. Een tweede begeleider van disse boomsoorte is de Beuke russula, die d'r krek zo uutzicht, aliend de kleur is eers: okergeel. De ere poddestoelen van disse groep bin zwat, gruuun, paors, gries en bruun en dat betekent dat ze mit mekaander zorgen veur een kompleet haastfeest!

Prachtig staon d'r ok de Amanieten, een groep zwammen die ok ondergronds in verbiening staot mit struken en bomen. Bi'j De Hoeve ontbrekt dan ok niet de Vliegezwam, de overbekende poddestoel, rood mit witte stippen. Een bruurtien daorvan is de Parelamaniet, een vlezig heerschap mit beige stippen en tenslotte ok de uutzonderlik mooie Narcisamaniet, die mit zien gele kleur wel de mooiste van zien hiele familie is.


Op ien dag in oktober weren d'r zoe'n 2000 poddestoelen in disse laene. Daorvan bleek 95 percent tot de typische beukebegeleiders te heuren.

In oonze gemiente bin d'r ok zwammen te zien die aj' d'r hielemaole niet verwaachten. Zo vun ik een peer jaor leden de Gekraagde Aardster in Wolvege. Wel een stok of tachtig stonnen d'r op een schaadplakken. Now kommen Gekraagde Aardsterren in Friesland echt wel meer veur mar dan aliend in de dunen van oonze eilanen. Op ere plakken wodt ie mar hiel zelden zien. Et zelde verhaal gelt ok veur de Gewimperde Aardster. Een stok of wat wodden verleden jaor zien op een plak vlakbi'j de veurige soorte. Et dichtste bi'j waor ik de Gewimperde Aardster zag is een perceel in de Kuunderbos, een paradies veur mycologen!

## PLAANTEN

Liekas ere plakken van Friesland ontkomt ok West-Stellingwarf niet an vrend volk uut ere

Gekraagde Aardster.




streken. Neem now mar es et Deens lepelblad. Dat is een ienjaorige kruusbloemige, die we hiel goed kennen uut de kuststreken, waarvan de bojem genoeg zoolt het. Now dot et 'm veur dat d'r in de winter nogal es mit pekel struid wodt en dat betekent dat d'r langs de dieken een protte zoolt in de grond zit, ok in et veurjaor. En juist in die tied komt disse ienjaorige plaante op en gaot gruuien en bluuien.

Eigenaorig is now dat disse zooltiefhebber in staot steld is om zien zaod langes de dieken te verspreiden en dus de hieltied veerder et laand in komt. In 1983 vun de heer W. G. de Jong uut Liwwadden de eerste exemplaoren bi'j Tietjerk langes de sneldiek Liwwadden-Grunningen. In 1985 zag de heer W. Lenstra uut Wolvege et plaantien. Beide de vondsten bin deurgeven an et Leids Herbarium, een centraol plak waor as botanische gegevens opsleugen en verwerkt wodden. Ik durf veerder best te veurspellen dat et tal van plakken waor aj' ze vienen kunnen uutbreid wotd in de kommende jaoren. Lao'we wat de plaanten an gaot es een netuurgebied uutzuken en lao'we dan mitien es kieken welke voegels d'r veurkommen.

## VOEGELS EN NOG MEER PLAANTEN

Et netuurgebied dawwe opzuken gaon is de onvolprezen Lendevallei. In ien van de maonden van et zomerhalfjaor rieden we naor Steggerde. Via de Hemweg koj' dan bi'j een rondwandering. Ie kun de auto daele zetten an et aende van disse weg. Dan lopen we een aentien weeromme en slaon linksof de netuur in.

Perceelties gröslaand en briede rietkraegen wisselen mekeer of. In april heur ie de Koekoek al, de Fitis, de Tijftjaf, mar ok de Rietgors. In meie dregen de Rietzanger en de Bosrietzanger heur ofwisselende lietien veur. Ok de Braamsluiper en de Tuinfluiter bin ondertied ankommen. Een stel Zwatte Sterns is van zudelike streken weeromme keerd en vormt een bescheiden kolonie. De peerties maeken een ienvooldig nust op Krabbe-



Deurschienend Fonteinkruud.

scheer, een drievende plaante mit vlezige, lange en ok stiekelige blaeden. In de veerte zit een Roerdomp in et riet. Et mannegien maekt een zwaor dreunend geluud dat op een ofstaand van inkelde kilometer nog te heuren is. In juni bluuien d'r de Gele Lissen.

Bi'j disse rondwandering koj' op een gegeven mement bi'j een gröslaantien te lane. In de zommertied bluuien d'r tientallen kleurige bloemen. De Grote Pimpernel bi'jgelieks, ok bekend op tal van ere plakken in oonze gemiente. De soort staot d'r bi'j tientallen en zo as et d'r now uutzicht breidet hi'j him ok nog wel veerder uut. Stug staot daor ok de Kaele Jonker, driegend mit zien stiekels naor alle kaanten, hi'j viert zien brulloft mit donkerpaorse bloemen. Geel schitteren de bloemsteerties van Tormentil, Kruipganzerik en Zilverschoon. De Moerasspirea wedievert mit de Engelwortel. En netuurlik bin daor ok de Melkeppe, Ridderzuring en Ruwe Smele. De Blauwe Zegge laot in juni al zien vruchten valen, Moerazegge en Hazezegge volgen, ieder op zien beurt. Iene die echt van volholen wet is de Kattestat, die zien felpaorse bloemen tot veer in et jaor bluuien lat.

Ommeraeek mooi in dit gebied bin sommige sloden. Wel tien soorten Fonteinkruud koj' d'r vienen en dat is mitien de helte van de soorten die as in Nederland veurkommen. Fonteinkruden bin echte waeterplaanten. De blaeden drieven of bin

## Et Stellingwarver laandschop

Wat bin de Stellingwarven mooi! West-aende mit zien wiede veergezichten, zien schitterende Scheene-gebied, de bossen van Ni'jhooltpae; Oostaende mit zien Delleboerster heide, zien Fochteler vene en de Appelschester bossen.

En dan numen we zo mar een peer plakken op vanzels, d'r bin nog vule meer. Zoks ontdek ie, aj' d'r es op uut trekken. De hieltied vien ie nog weer mooie plakkes om es te lopen en te kieken.

Meensken, die as zo staorigies an alle mooie plakkes wel weten zullen, bin de heren Zeinstra uut Wolvege en Scheenstra uut Oosterwoolde. Philip Zeinstra het een wekelikse netuurrebrick „Oonze natuur” in de „Stellingwarf”, wiels Wiebe Scheenstra de wekelikse rebrick „Zwalcken door het Fries-Drentse wold” in de „Ni'je Oost-Stellingwarver” schrift.

Jim zullen ok wel mit krek lieke vule plezier die stökkies lezen as wi'j! Daorum leek et oons ok aorig dat beide schrievers ok veur ónze kraante es een verhaal over de Stellingwarver netuur schreven. Zi'j hebben dat graeg veur oons en jim daon, dat zuwwe ze mar niet vot-en-daolik an et woord laoten?

onder waeter deuken en ze bluuien mit een kleine aore, die boven et waeter uutstikt. In juli kuj' in een sloot, vlakbi'j et parkeerplak et deurschienend Fonteinkruud vienen, tegere mit deurgruuid, drievend en gekroesd Fonteinkruud. Fonteinkruudfanatiekelingen kun hier heur hatte op-haelen!

Een voettocht deur de Lendevallei levert de hieltied weer wat ni'js op. Dat gelt ok veur de Rottige Mienthe, een vochtig netuurgebied bi'j Ni'jtriene. Ik kan et jim anbevelen om ok hier es stappen te gaon.

## DE BLES DIEKER HEIDE

In dit terrein ligt een typisch ieken-birkenbos en veerder bin d'r stökkies heide. In de bos staon plaanten die typisch veur et ieken-birkenbos binnen. D'r staot een protte Hengel, Salomonzegel en netuurlik Dalkruud, et sierlike grössien Bochtige Smele en de witbluierende Grootbloem-muur.

## SLOT

West-Stellingwarf is een gemiente mit een protte variaosie in de begruuing en et dierlike leven. D'r kommen ok een protte biezonderheden veur in de betekenis van zeldzemen. Zo bin d'r een peer plakkes mit de zeldzeme Klokjesgentiaan. Daorvan is een zeldzem vliindertien ofhankelijk. Et is Gentiaanblauwgien, een familielid van de Grote Vuurvlinder. Lao'we oons in de toekomst nog meer inspannen om disse twee en nog vule meer ere soorten waor as et niet goed mit gaot een roemer en beter milieue te bieden. Ok in et rieke West-Stellingwarf.

Philip Zeinstra, Wolvege

## N.B. VAN DE REDAKTIE

As d'r meensken binnen die veur de numde dieren en plaanten echte Stellingwarver naemen hebben, zollen die die naemen misschien wel deurgeven willen an de Stellingwarver Schrieversronte? We hebben d'r al hiel wat, mar d'r bin vast en zeker nog wel meer! Al vast dank daorveur!

Grote Pimpernel in bluii.



